



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 464 / Prot.
3

Tiranë, më 14 / 4 /2017

VENDIM

Nr. 63, datë 14 / 4 /2017

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 “Për të drejtën e informimit”, shkronjës a) të nenit 31/1 të ligjit nr. 9887 datë 10.03.2008 “Për mbrojtjen e të dhënave personale” i ndryshuar, Komisioneri për të Drejtën e Informimit dhe Mbrojtjen e të Dhënave Personale,

V Ë R E N:

Ankuesi, Qendra “Res Publica”, përfaqësuar nga Av. _____, në cilësinë e Drejtorit Ekzekutiv, ka depozituar pranë Zyrës së Komisionerit për të Drejtën e Informimit dhe Mbrojtjen e të Dhënave Personale (në vijim quajtur “Komisioneri”) ankimin nr. 1536 Prot., datë 27.12.2016, kundër Autoritetit Publik “Prokuroria e Përgjithshme/ Prokuroria pranë Gjykatës së Shkallës së Parë Sarandë”, me objekt “Ankim ndaj refuzimit për dhënie informacioni dhe kopje të dokumenteve zyrtare”.

Ankuesi nëpërmjet kërkesës për informim datë 05.10.2016 me nr. 080/16 depozituar pranë Prokurorisë pranë Gjykatës së Shkallës së Parë Sarandë, ka kërkuar vënien në dispozicion të informacionit si më poshtë:

- Në çfarë faze është procedimi penal për kallëzimet e bëra nga Kontrolli i Lartë i Shtetit (KLSH) me kallëzimin me nr.prot.709/16, datë 26.12.2013 dhe 709/17 datë 26.12.2013 ndaj punonjësve të ALUIZNI-it Sarandë ?;
- Kopje të vendimit të marrë nga Prokuroria për kallëzimin nr.prot.709/16 dhe nr.prot.709/17, datë 26.12.2013;
- Kopje të kallëzimeve të bëra nga KLSH me nr.prot.709/16, datë 26.12.2013 dhe nr.prot.709/17, datë 26.12.2013;
- A i është komunikuar KLSH-së vendimi i marrë nga Prokuroria për kallëzimet e mësipërme dhe në cilën datë ?

Me shkresën nr. 298/1 Prot., datë 09.11.2016 Autoriteti Publik “Prokuroria pranë Gjykatës së Shkallës së Parë Sarandë” i ka kthyer përgjigje kërkuarit, duke i vënë në dispozicion Vendimin e Gjykatës së Rrethit Gjyqësor Sarandë për kallëzimin me nr. Prot. 709/17 datë 26.12.2016.

Ndryshe nga sa është parashtruar në kërkesën për informim, Autoriteti Publik “Prokuroria pranë Gjykatës së Shkallës së Parë Sarandë”, nuk ka vënë në dispozicion të kërkuarit informacion lidhur me vendimin e marrë nga vetë prokuroria për dy kallëzimet e paraqitura

nga KLSH, kopje të këtyre kallëzimeve si dhe nëse është njoftuar KLSH lidhur me vendimmarrjen e prokurorisë.

Në vijim të korrespondencës me kërkuesin, Autoritetit Publik "Prokuroria pranë Gjykatës së Shkallës së Parë Sarandë", me shkresën nr. 298/3 Prot., datë 30.11.2016 i ka vënë në dukje kërkuesit mungesën e legjitimitetit të tij në lidhje me dokumentacionin dhe të dhënat e kërkuara. Gjithashtu ka informuar kërkuesin se dokumentacioni i kërkuar administrohet nga Gjykata e Rrethit Gjyqësor Sarandë.

Pas refuzimit të dhënies së informacionit nga Autoriteti Publik "Prokuroria pranë Gjykatës së Shkallës së Parë Sarandë", ankuesi depozitoi pranë Komisionerit ankimin duke i kërkuar këtij të fundit ushtrimin e kompetencave që i njej ligji për rastet e refuzimit të dhënies së informacionit.

Nga shqyrtimi i ankesës dhe konsultimi i legjislacionit përkatës rezulton se, informacioni i kërkuar nga Qendra "Res Publica" administrohet nga Autoriteti Publik "Prokuroria pranë Gjykatës së Shkallës së Parë Sarandë", në kuadër të një kallëzimi penal të depozituar pranë kësaj prokurorie nga KLSH ndaj punonjësve të ALUIZNI-t Sarandë.

Rrjedhimisht, në shqyrtimin e çështjes gjejnë zbatim dhe dispozitat e Ligjit nr. 7905 datë 21.3.1995 "Kodi i Proçedurës Penale i Republikës së Shqipërisë", i ndryshuar, së bashku me kufizimet që ky ligj mund të përmbajë lidhur me publikimin e informacionit.

Duke pasur parasysh pikat 2 dhe 3 te objektit të kërkesës për informim, Autoriteti Publik, në bërjen publike të informacionit duhet të zbatojë kufizimet sipas pikës 1 a) dhe pikës 6 të nenit 17, të Ligjit nr. 119/2014 "Për të drejtën e informimit" i cili përcakton se, nëse kufizimi prek vetëm një pjesë të informacionit të kërkuar, pjesa tjetër duhet t'i vendoset në dispozicion kërkuesit.

Personat përgjegjës për dhënien e informacionit të kërkuar duhet të bëjnë anonimizimin e të dhënave në përputhje me nenet e sipërcituara, si dhe nenet 5, 6 dhe 7 të Ligjit nr. 9887, datë 10.03.2008 "Për mbrojtjen e të dhënave personale", i ndryshuar.

Theksojmë, se e drejta për t'u informuar është një prej të drejtave themelore të njeriut, e parashikuar në nenin 23 te Kushtetutës së Republikës së Shqipërisë. Kjo e drejtë duhet parë e lidhur ngushtë me parimin e transparencës dhe llogaridhënies, si një shtyllë tjetër themelore e shtetit të së drejtës. Funkzionimi i tyre do të ishte në interesin e të dy palëve.

Në këto kushte, në lidhje me ankesën e Qendrës "Res Publica" ndaj Autoritetit Publik "Prokuroria e Përgjithshme/ Prokuroria pranë Gjykatës së Shkallës së Parë Sarandë", Komisioneri vlerëson se ankesa është e bazuar në ligj dhe si e tillë ajo duhet pranuar.

PËR KËTO ARSYE

Bazuar në shkronjat b) dhe ç) të pikës 5 të nenit 24, nenit 25 të ligjit nr.119/2014 'Për të drejtën e informimit', shkronjën a) të pikës 1 të nenit 18 të ligjit nr 49/2012 'Për organizimin dhe funksionimin e gjykatave administrative dhe gjykimin e mosmarrëveshjeve administrative',

V E N D O S A:

1. Pranimin e ankesës së Qendrës “Res Publica” me Nr. 1536 Prot., datë 27.12.2016, ndaj Autoritetit Publik “Prokuroria e Përgjithshme/ Prokuroria pranë Gjykatës së Shkallës së Parë Sarandë” me objekt “Ankim ndaj refuzimit për dhënie informacioni dhe kopje të dokumenteve zyrtare”.
2. Urdhërimin e Autoritetit Publik “Prokuroria e Përgjithshme/ Prokuroria pranë Gjykatës së Shkallës së Parë Sarandë”, për vënien në dispozicion të informacionit të kërkuar sipas kërkesës për informim nr. 080/16, datë 05.10.2016 në përputhje me nenin 17, pika 6 e Ligjit nr. 119/2014 “Për të Drejtën e Informimit” brenda datës 24. 4 .2017.
3. Kundër këtij vendimi palët kanë të drejtën e ankimit në Gjykatën Administrative Tiranë, brenda 45 ditëve nga marrja dijeni, sipas nenit 25 të ligjit nr. 119/2014 “Për të drejtën e informimit”.
4. Ky vendim u dha sot me datë 14. 4 .2017.

